



Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 8. Mee 2026

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Inneminister an d'Madamm Justizminister weiderzeleeden.

An der Äntwert op meng parlamentaresch Fro Nummer 1573 iwwer Leit déi sech trotz ongeklärter Identitéit an Nationalitéit zu Lëtzebuerg ophalen, huet d'Regierung ënner anerem dat hei geschriwwen: *"Persounen, déi aus dem Centre de rétention entlooss ginn, ouni bei der Feststellung vun hirer Identitéit kooperéiert ze hunn, hu keng legal Identitéit fir hiren Alldag ze organiséieren a kënnen zum Beispill keen "Certificat de résidence" kréien. Si kënnen och keng Demarchë maachen, bei deenen ee gültegt Identitéitsdokument gefrot ass"*. Theoretesch ass hautzedaags all Mënsch op der Welt, Bierger vun engem oder méi Staaten. International Ausname komme virun allem a vereenzelte Weltgéigende vir, wou staatlech Strukture relativ schlecht funktionéieren oder Minoritéiten den Accès zu der Staatsbiergerschaft bewosst verweigert gëtt (z.B. am Myanmar).

Et ass awer deementspreechend kaum dovun auszegoen, datt sech Leit mat ongeklärter Identitéit an Nationalitéit a grousser Zuel zu Lëtzebuerg ophale kënnen, ausser déi betraffe Persoune wëllen déi entsprechend Informatiounen bewosst verstoppen.

An deem Zesammenhang géif ech der Regierung gär dës Froe stellen:

- 1) Kann d'Regierung eng Tabell presentéieren, déi regruppéiert, wéi vill Leit mat ongeklärter Identitéit an/oder Nationalitéit vun 2015 bis 2025 inclus op Lëtzebuerg komm sinn, a wéi ville Fäll déi Identitéit/Nationalitéit konnt nodréiglech gekläert ginn a wéi vill Leit a sou enger Situatioun sech aktuell insgesamt zu Lëtzebuerg ophalen?
- 2) Kann d'Regierung am Sënn vun der Fro virun eng Tabell presentéieren, déi regruppéiert, wéi enge Staaten déi betreffend Persounen, wou d'Identitéit nodréiglech gekläert gouf, zougeuerdent goufen, ëm wéi vill Persounen (an absoluten Zuelen) et sech jee weils gehandelt huet an a wéi ville Fäll si konnten an déi Staaten zeréckgefouert ginn?
- 3) Kann d'Regierung eng Tabell presentéieren, déi regruppéiert, wéi vill staatenlos Persounen zu Lëtzebuerg tëschent 2015 an 2025 strofrechtlech verurteelt goufen a wéinst wéi engen Delikter?
- 4) Wéi héich ass den Undeel vu staatenlose Persounen am Verglach zu der Gesamtzuel vun eisen Awunner? Wéi presentéieren déi Zuelen sech am Verglach zu eisen dräi Nopeschlänner?

Mat déiwem Respekt,

Dan Hardy  
Deputéierten